

NAQQIUT

Saqqummiussissut 13. aprili 2016-meersup taartaa

(Siunnersuutip qulequtaani kalaallisut allanneqarnera naqqiissutigineqarpoq)

Siunnersuut uunga: Isumaginnittoqarfiup aqunneqarnera aaqqiissuusaaneralu pillugit Inatsisartut peqqussutaata allannngortinneqarneranik Inatsisartut inatsisaat nr. xx.xx 2016.

(Ilaqutariinnermut, Naligiissitaanermut Isumaginninnermullu Naalakkersuisoq)

Saqqummiussissut

(Ilaqutariinnermut, Naligiissitaanermut Isumaginninnermullu Naalakkersuisoq)

Siullermeerneqarnera

Inuiaqatigiinni ajornartorsiortut illersornissaat Naalakkersuisut aalluppaat, aammalu isumaginnittoqarfiup aqunneqarnera aaqqiissuusaaneralu pillugit Inatsisartut peqqussutaata allannguuteqartinneqarnissaa pillugu Inatsisartut inatsisissaattut Naalakkersuisut siunnersuutaat, tamanna eqqarsaatigalugu isigineqassaaq.

Kommunip pisussaaffii imaluunniit innuttaasut pisinnaatitaaffii annertuumik sumiginnarneqarsimappata, kommunini isumaginninnermut inatsisinik ingerlatsivimmi aqutsinerup piffissami aalajangersimasumi tamakkiisumik ilaannaasumilluunniit atorunnaarsissinnaanissaanut Naalakkersuisut siunnersuummi periarfissinneqarput.

Aallarniutigalugu erseqqissassallugu pingaaruteqarpoq qanittumiinnermut tunngaviusup atorunnaarsinnissaa aammalu isumaginninnermut suliassaqrarfiup ingerlatsivimmi aqunneqarneranik qitiusumut inissiinissaq Naalakkersuisut kissaatiginngimmassuk. Isumaginninnikkut suliniuteqarnerit innuttaasoq qanillugu aammalu innuttaasoq qitiutillugu pissasut Naalakkersuisut kissaatigaat.

Ullumikkut meeqqanut suliassani, suliassanik suliarinnittarnermut aalajangiisarnermullu kommunit akisussaasuupput, Naalakkersuisoqarfik isumaginninnermi susassaqrarfinnut tunngatillugu kommunit ingerlatsivimmi aqutsinerannik nakkutilliisuulluni.

Nakkutilliinerit ingerlanneqarneranni paasineqarpoq meeqqanut ajornartorsiortunut tunngatillugu nalunaarutiginninnerit ikiorsiissuteqarnerillu pillugit suliani kommunit suleriaasianni iliuuseqartannginneq annertoorujussusoq.

Nakkutilliinnermi paasineqarpoq, kommunini ingerlatsiviit sumiginnaanernik ilungersunartunik ilisimasaqarsimallutik suliani iliuuseqartarsimanngitsut aammalu suliassat

ilungersunassusaannut naapertuuttumik iliuseqartarsimangitsut. Tassani pineqarput assersuutigalugu persuttaaneq, atornerluineq paarsinerlunnerlu pillugit nalunaarutiginninnerit.

Isumaginninnikkut nakkutilliinnermut ingiaqatigitillugu isumaginninnermut Naalackersuisoqarfik, angerlarsimaffiup avataanut inissiisarnermut tunngasut paasinarsisinniarlugit aammalu iliussissanut pilersaarutit inatsisitigut piumasaqaataasut nutarterneqarnissaat eqqarsaatigalugu, 2014-imi kommuninut angalaqatigiittartunik sulisoqarpoq. Aamma tassani suliassanik suliarinninnermi ilungersunartumik kinguaattooqqasoqarpoq.

Allatut oqaatigalugu kommunit tamarmik assigiinngitsumik annertussuseqartumik suliassanik suliarinnittarnermi iliuseqartarsimangitsut, amigartumik imaluunniit kukkusumik iliuseqartarsimasut paasineqarpoq. Kommunit sumiginnaanerisa kingunerisaanik meeqqat ajornartorsiortut iluarsineqarsinnaanngitsunik timimikkut eqqarsartaatsimikkullu ajoquserneqarsimasut ilimanaateqarpoq.

Inatsisissatut siunnersuut manna nakkutilliisut takusaannut annilaarnartunut qisuariaataavoq.

Nakkutilliisut takusaat pillugit ilisimatitsissuteqareernerup kingorna Inatsisartut Ilaqutariinnermut Peqqissutsimullu Ataatsimiititaliaata allakkani ulloq 5. maj 2015 aperivaangga, isumaginninnermut suliassaqaqfimmu akisussaaffiup pingaernerup kommuninut inissineqarnerani politikkikkut neriulluarpallaarsimanersugut imaluunniit piviusorsiunngippallaarsimanersugut, aammalu isumaginninnermut suliassaqaqfiup ilaa imaluunniit tamakkerlugu qitiusumut inissineqartariaqannginnersoq. Naalackersuisuni taamatut isumaqanngilagut. Kisianni isumaqarpugut isumaginninnikkut nakkutilliinerup aammalu kommunit suliassartik tatigineqarlutik suliakkiissutigineqarsimasoq sumiginnaarpasuk iliuseqarnissamut periarfissatta nukittorsarneqarnissaat pisariaqartinneqartoq paasinartoq.

Kommunit ilaginnaanerisa inuiaqatigiinni sunniutai annertoorujussuussasut qularutissaanngilaq. Sumiginnaaneq misigissutsikkut ineriartunnginnermik, qaratsakkut ajoqusernermik aamma meeqqat eqqarsartaatsimikkut innarliisumik nappaateqalernerannik malitseqarsinnaasoq, uppersarluarneqartareerpoq. Ilaginnaanerit meeqqat atuarnerannut sunniisussaapput aammalu ingerlanerliulernermut aallarniutaasinnaallutik, tassani meeqqat piviusumik pisinnaatitaaffiagaassallutik aammalu ilaqutariittut inuunissamut, ilinniarnissamut pitsaasumillu inersimasutut inuunissamut periarfissaarutsinneqassallutik.

Iliuseqarnissamut periarfissat annertusineqarnissaat pisariaqartoq Naalackersuisut isumaqarnerannut, Meeqqat Illersuisuata Qaasuitsup Kommunianit nalunaarusiaa isornartorsiuisoq ilapittuutaavoq. Meeqqanut inuusuttunullu suliassaqaqfimmi suliassat pineqartillugit Naalackersuisut meeraq qitiutinniarpaat. Kisianni ajoraluartumik siullermik angajoqqaat tuliullutillu kommunit sumiginnaaneranni meerarpasuit marloriaammik sumiginnaarneqarlutik ajornartorsiortut takusarpavut.

Oqallinnermut atatillugu saqqummiunneqarpoq inatsisissatut siunnersuut kommunit namminersortuunerannut akuliunnerusoq, aammalu kommunit missingersuutaasa aqunneqarnerinik tigusinissaq Naalackersuisut kissaatigigaat. Tamakkuninnga siunnersuut siunertanikk taamaattunik tunngaveqartoq erseqqissumik paatsuugassaannigsumillu ilumuunnginnerassavara. Oqaatigineqareersutut isumaginninnermi suliniuteqarnerit innuttaasut qanillugit aammalu innuttaasoq qitiutillugu pissasut Naalackersuisut kissaatigigaat. Isumaginninnermut politikkitsinni qanittumiinnermut tunngaviusoq tunngavigineqarpoq, aammalu suli isumaqarpugut suliassat innuttaasunut tunngassuteqartut kommunini inissisimagunik pitsaanerussasoq.

Naalackersuisut – ilaatigut meeqqanut inuusuttunullu kommunit pisussaaffimminnik annertuumik sumiginnaanerat aallaavigalugu – inatsit manna malillugu isumaginninnermut maleruagassat ataatsimoortut tamakkerlugit imaluunniit ilaannik kommunit ingerlatsivimmi aqutsinerannik atorunnaarsitsinissaq aalajangiuppasuk, tamanna kommunit aningaasaqarnerat ataqqillugu aammalu kommuni qanimut suleqatigalugu pissaaq. Tamanna erseqqilluinnartumik ataatsimoorluta soqutigisaraarput.

MIO-p inatsisissatut siunnersuut tapersersormagu nuannaarutigaa. Taamatuttaaq suliniutinut meeqqat inuusuttullu atugarissaarnissaannut suliaqarnermik nukittorsaasinnaasunik siuarsaanissamat, ilanngullugu nakkutilliinerup nukittorsarneqarnissaanut isumalluutinik pissarsinissaq, politikikkut tapersersorneqarnissaq naatsorsuutigisinnaagiga, Inatsisartut Ilaqutariinnermut Peqqissutsimullu Ataatsimiititaliaata allakkani ulloq 5. maj 2015-imeersuni oqaatigimmagu, nuannaarutigaa.

Neriuutigaara Inatsisartuni partiit siunnersuut, tunngaviusumik inuiaqatigiinni imminut illersorsinnaanngitsut ajornartorsiortut; tassalu meeqqat inuusuttullu ajornartorsiortut, illersorneqarnissaannik siunertaqartoq, tapersersorumaaraat.